

四庫全書

史部

欽定四庫全書

蜀中廣記卷九十八

明 曹學佺 撰

著作記第八

集部

鮮于伯圭集一卷

宋鮮于懷字伯圭閬中人累舉不第嘗作攄愁詞時人稱之李宗諤贈詩云漢殿無人薦揚子滿朝空誦攄愁

詞後與宗諤同年第四人登科趙普判秦州辟為觀察
推官卒

民士編一十九卷

陳充字若虛成都人雍熙中甲科仕至刑部郎中知貢
舉卒詞學典瞻性曠達喜談謔澹於榮利自號中庸子
民士云者蓋其未仕已仕前後所著文也唐牛僧孺著
善惡無餘論言堯舜伯鯨俱不能慶殃其子充因作論
以反之

朱台符文集三十卷

宋史台符字拱正眉山人十歲能屬辭常作黃山樓記
為當時所稱太宗廷試以尺晷成一賦登進士甲科好
學喜延譽後進景德初為陝西轉運與時不合再出知
洪州卒年四十二

五龍山居詩

謝全長江人居五龍山下以詩自娛其詩平澹有浪仙
之風司馬池知小溪縣與之定交太平興國五年進士

田表聖咸平集五十卷 三朝奏議五卷

田錫字表聖其先京兆人唐末徙于蜀宋初與胡旦何士宗齊名興國三年進士第知制誥終右諫議大夫范仲淹司馬光讀其書皆稱其直諫蘇軾以之比賈誼云

牟君華文集

牟袞字君華安岳人受學於多岳先生端拱間登進士第以文章名累官翰林學士有詩文行于世

東觀集十卷

華陽羅處約思純著知吳縣時王元之禹偁亦知長洲日與唱和蘇杭間多傳誦之淳化中受詔荆湖路巡撫欲以苛察立名所奏劾甚衆卒年三十三無後禹偁與蘇易簡收其文

漁舟集一卷

成都處士郭震希聲撰自稱汾陽山人李旼序稱其所作有孟郊風致淳化四年忽作詩曰朝出東門遊東門好春色青青原上草莫放征馬食詣闕獻書言蜀利病

未幾順賊已作矣

王岳集一卷

陳氏曰岳集中有春日感懷上滕白郎中蓋亦宋初人
又有聖駕親征河東及甲午避寇全家欲下荆南之語
則是李順亂蜀之歲岳蓋蜀人也耶

李建中集三十卷

建中字得中其先京兆人祖稠仕於蜀遂為蜀人興國
中進士甲科累官主客員外郎性簡靜風神雅秀恬於

榮利前後三求掌西京留司御史臺愛洛中風土就構
園池號曰靜居好吟詠每遊山水多留題自稱巖夫民
伯善脩養預校定道歲卒建中善書札行筆尤工多構
新體草隸篆籀八分亦妙人多摹習嘗手寫郭忠恕汗
簡集以獻皆科斗文字詔嘉獎之

玉堂集二十卷

蘇易簡著易簡字太簡銅山人弱冠舉進士太平興國
五年狀元官翰林承旨太宗書玉堂之署賜之故以名

其集終叅知政事

文房四寶五卷 文選類要三卷

易簡撰集古今筆硯紙墨四門繼以賦頌述作有徐鉉
序又摘文選雙字以類編集為類要三卷

翰林續志二卷 禁林宴會集三卷 淳化編

勅三十卷

晁氏曰蘇易簡在北門最承太宗睽遇錄元和以後至
國朝翰林故事以續季肇之書太宗賜詩嘉之

翰林雜誌一卷

其書不題撰人輯唐韋執誼故事元稹承旨壁記韋采
微新樓記杜元穎監院使記鄭璘視草亭記并李宗諤
題名記為一篇或云易簡子者采其父翰林續志所遺
附益之

滄浪集十五卷

蘇舜欽撰舜欽字子美易簡之孫杜祁公行之壻也景
祐中進士累遷集賢校理監進奏院坐用故紙錢會客

除名慷慨有大志好古工文章及廢居蘇州買水石作
滄浪亭益讀書發其憤懣於歌詩其體豪放往往驚人
又善草書醉酣落筆爭為人所傳翫

舜欽報韓維書曰蒙開責以兄弟在京師不以義相就
獨羈外數千里自取愁苦予豈無親戚之情豈不知會
合之樂也安肯舍安逸而甘愁苦哉昨在京師不敢犯
人顏色不敢論議時事隨衆上下心志蟠屈不開固亦
極矣不幸適在嫌疑之地不能決然早自引去致不測

之禍猝去下吏人無敢言友讎一波共起謗議被廢之
後喧然未已更欲寘之死地然後為快來者往往鉤賸
言語欲以傳播好意相恤者幾希矣故閉戶不敢與相
見如避兵寇偷俗如此安可久居其間遂超然遠舉羈
泊於江湖之上不惟衣食之累實亦少避機穽也況血
屬之多資入之薄持國見之矣常相團聚可乏衣食乎
不可也可閉關常不與人接乎不可也與人接必與之
言與之言必與之還往使人人皆如持國則可不迨持

國者必加釀惡言宣布上下使僕不能自明則前日之事未為重也都無此事亦終日勞苦應接之不暇寒暑奔走塵土泥淖中不能了人事羸馬餓僕日栖栖取辱于都城使人指背譏笑哀憫亦何顏面安得不謂之愁苦哉比雖與兄弟親戚相遠而伏臘稍足居室稍寬無終日應接奔走之勞耳目清曠不設機關以待人心安閒而體舒放三商而眠高齋而起靜院明窻之下羅列圖史琴樽以自愉悅有興則泛小舟出盤閭二門吟嘯

覽古於江山之間渚茶野釀足以銷憂葺鱸稻蟹足以適口又多高僧隱君子佛廟勝絕家有園林珍花奇石曲池高臺魚鳥留連不覺日暮昔孔子作春秋而夷吳又曰吾欲居九夷觀今之風俗樂善好事知子守道好學皆欣然願來過從不以罪人相遇雖孔子復生是亦必欲居此也以彼此較之孰為然哉人生內有自得外有所適固亦樂矣何必高位厚祿役人以自奉養然後為樂今雖僑此亦如仕宦南北安可與親戚常相守耶

子窘迫勢不得如持國意必使我尸轉溝洫肉饑虎而後以為安所義何其忍耶詩曰凡今之人莫如兄弟兄弟以恩急難必相拯救後章曰喪亂既平既安且寧雖有兄弟不如友生謂友朋尚義安寧之時以禮義相琢磨子以持國外兄弟也急難不相救又於未安寧之際欲以義相琢磨雖古人所不能受子欲不報慮淺吾持國也按舜欽以父任補太廟齋郎調滎陽縣尉王清昭應宮災舜欽年二十一詣登聞鼓院上疏范仲淹薦其

才召試為集賢校理監進奏院所論議多侵權貴而其婦翁杜衍與富弼在政府多引用一時間人欲更張庶事御史中丞王拱辰等不便其所為會進奏院祠神舜欽與右班殿直劉巽輒用鬻故紙公錢召妓樂間宴會賓客拱辰廉得之諷其屬劾奏因欲搖動行事下開封府劾治於是舜欽與巽俱坐自盜除名舜欽既廢寓吳中其友人韓維責以隔絕親交故報書云

歐陽氏序曰斯文金玉也棄擲埋沒糞土不能銷蝕其

見遺於一時必有收而寶之于後世者雖其埋沒而未
出其精氣光怪已能常自發見而物亦不能掩也故方
其擯斥摧挫流離窮厄之時文章已自行於天下雖其
怨家讎人及嘗出力而擠之死者至其文章則不能少
毀而掩蔽之也凡人之情忽近而貴遠子美屈於今世
猶若此其伸於後世宜何如也公其可無恨予嘗考前
世文章政理之盛衰獨恠唐太宗致治幾乎三王之盛
而文章不能草五代之餘習後百有餘年韓李之徒出

然後元和之文始復于古唐衰兵亂又百餘年而聖宋興天下一定晏然無事又幾百年而古文始盛于今自古治時少而亂時多幸時治矣文章或不能純粹或遲久而不相及何其難之若是歟豈非難得其人歟苟一有其人又幸而及出于治世世其可不為之貴重而愛惜之歟嗟吾子美以一酒食之過至廢為民而流落以死此其可以歎息流涕而為當世仁人君子之職位宜與國家樂育賢才者惜也子美之齒少予而予學古文

反在其後天聖之間予舉進士于有司見時學者務以
言語聲偶擿裂號為時文以相誇尚而子美獨與其兄
才翁及穆叅軍伯長作為古歌詩雜文時人頗共非笑
之而子美不顧也其後天子患時文之弊下詔書諷勉
學者以近古由是其風漸息而學者稍趨古焉獨子美
為於舉世不為之時其始終自守不牽世俗趨舍可謂
特立之士也子美官至大理評事集賢校理而廢後為
湖州長史以卒享年四十有一其狀貌竒偉望之昂然

而即之溫然久而愈可愛慕其才雖高而人亦不甚嫉
忌其擊而去之者意不在子美也

才翁集一卷

蘇舜元字才翁銅山人子美兄也有氣節能詩尤工草
書所著有才翁集

張少愚白雲集三十卷

張俞字少愚幼通悟於書無不該貫朝廷嘗以校書郎
召表乞授其父隱於岷山之白雲溪凡六被徵召皆不

起為文有西漢風嘗賦洛陽懷古蘇子美見而嘆曰優游感諷意不可盡吾不能也

陳文惠公愚邱集三十卷

陳堯佐字希元閬州人端拱初進士歷官太子太師致政年八十二卒號知餘子謚文惠堯佐屬辭尚古不牽世用喜為二韻詩詞調雋永又有湖陽野廬遣興等集皆自有序

本傳文惠少好學及貴讀書不輟善古隸八分尤工詩

金龜集十五卷

文惠從子漸著漸與父堯封同廷試漸中第辭不就願擢其父許之自號金龜子

澗上大人詩二十卷

陳恬叔易著堯叟裔孫也博學有高志不從選舉躬耕陽翟與鮮于綽崔鷗齊名號陽城三士別號澗上大人詩句豪健其苦離別詩記靖康亂離之事傳誦于時

隱書三卷 學古詩五十篇

華陽梁昂凝正著端拱進士獻聖德徽號頌萬餘言遷
殿中丞歷知數州磊落有氣節好學工篆籀

任玠詩集

玠成都人通五經緯候音律琴奕丹青皆得其妙真宗
令試學士院玠撰詩一千二百首以進賜進士授汝州
團練推官玠具野服捧告身詣登聞鼓院納還西歸

書臺集三卷

南隆處士朱有字大有自稱雲臺山人天禧中王晦叔

守蜀以古風六十言遺之書臺者其所居坊名也

郭長孺歌詩雜文十卷

長孺不知何許人遷徙入蜀遂為成都人氣體夷粹遇人無貴賤磬折下之然其中提拔不倚終日劇談無雜嫚戲語生平惟好書丹鉛點勘不去手自經史百氏浮屠黃老陰陽地理醫卜吐納煅煉之術皆研精其妙有易解十卷書解七卷道德經解三卷蔬食譜一卷又有孝行高逸等圖各為之論述

何通夫遺稿

何羣字通夫西充人嗜古學喜激揚議論雖業進士非其好也入太學與人言未嘗下意曲從同舍目為白衣御史上書言後世以文辭取士害道者莫甚於賦請罷去不聽乃慟哭取其平生所為賦八百餘篇焚之絀太學而卒趙抃在蜀奏羣遺藁有益時政宜表章之不聽

竹軒集

陵州龍昌期起之著祥符中韓魏公使蜀奏授試國子

四門助教慶歷中文潞公奏授校書郎府學講說經義
為太子洗馬致仕起之著書甚富以羽翼先儒汲引後
學為已任時多譽之嘉祐中詔取其書昌期時年八十
餘野服詣京師賜緋魚絹百疋歐陽公言其異端害道
不當推獎奪所賜服罷歸卒

按福州守陳絳嘗延昌期入閩為衆講易得錢十萬而
歸絳由此坐罪遂自成都械昌期至後守永康胡則子
正為之破械出俸錢代償館以賓禮昌期所著書時有

詭誕穿鑿之說誠斥周公此所以得罪也

虛舟子集

李定著邕縣人好古力學志不願仕養二親以孝聞累舉孝廉不就以詩酒為樂自號虛舟子蜀中洊值兵火經籍不完天禧中詔訪天下書籍定率先投牒監中羣書多出其家

于至詩文

于至登大中祥符五年徐奭榜進士及第七歲能屬文

十七遊京師上書二十餘萬言是時文章襲五代餘風
至自立機軸嘗作蓬萊宮賦冠萊公丁晉公皆重之有
詩文行世小溪人

陳公弼文集十卷

青神陳希亮著公弼其字也幼孤好學其兄使治息錢
希亮悉召逋家焚券使去天聖中舉進士以才幹剛直
名卒官京東轉運使即李常之父

彭秘書文集 墨客揮犀十卷

宋史彭乘字利建華陽人進士及第歷秘書丞集賢校
理累遷翰林學士質重寡言聚書萬餘卷皆手自刊校
蜀中所傳書多出於乘晚歲歷典贊命而文詞少工云

梅諫議詩集 奏疏四十篇

新繁梅贄公儀著贄進士起家慶歷中為御史嘗論張
堯佐緣官掖以進恐上累聖德仁宗稱其言事有體性
淳靜不為矯勵之行平居未嘗問生業喜為詩多警句

廬江文集二十卷 刀筆五卷 奏議二十卷

何郊著郊字聖從成都人仁廟朝為御史擢天章閣待
制熙寧中以尚書右丞致仕天資好學殆廢寢食為詩
章簡重淳淡有孟東野之風其任臺諫知無不言頗有
直聲鮮于子駿志其墓集有李邦直序

華陽集一百卷 岐公宮詞一卷

王珪字禹玉其先成都人右補闕永之子也故號華陽
後居開封少好學日誦數千言及長博通羣書慶歷二
年廷試第二嘉祐初入翰林文章闋麗自成一家朝廷

大典冊多出其手後拜相封岐國公卒年六十七謚文恭

迂遺集十三卷

安仁計用章著用章年十八登天禧進士第五人孫有功登慶曆進士著唐詩紀事行于世

孫文懿集三十卷

孫抃字夢得眉山人六世祖長孺喜藏書以樓貯之蜀人號書樓孫家抃之從兄闢復於東山構屋三百楹號

山學延成都何維翰為掌教以聚四方學者有公養之
法范鎮石揚休蒲師孟皆執經其中闕卒門人私謚曰
儒心先生拊天聖中進士累官叅知

蘇明允嘉祐集十五卷

蘇洵字明允眉山人至和中歐陽永叔得其書二十二
篇大愛之以為賈誼劉向不過也以書獻除校書郎與
姚子張同編太常因革禮百卷書方成而卒

陳氏曰洵初入京師益帥張文定薦之歐陽公世皆知

之而有雷簡夫者為雅州以書薦之張歐及韓魏公尤力張之知洵由簡夫世罕知之也簡夫書文亦慷慨偉麗可喜

蘇文忠集四十卷 後集二十卷 內制十卷

外制三卷

軾字子瞻洵之長子也生十年其母授以書聞古今成敗輒能語其要比冠學通經史屬文日數千言嘉祐中歐陽公知貢舉欲以冠多士疑曾子固所為乃寘之第

二後以書謝永叔見之語客曰老夫當避此人放出一頭地又以直言薦之荅策入上等英宗在藩邸聞其名欲以唐故事召入翰林宰相不可知湖州言者摘其謝表中語以為謗逮赴御史臺子瞻當王安石紛更之際見其事不便於民則賦詩以諷之故言者從而擠陷欲寘之死神宗薄其過責置黃州溫公相哲宗累擢中書舍人除翰林學士承旨紹聖中坐草責呂惠卿制安置惠州徙昌化元符初北還卒于常州初軾好賈誼陸贄

書論古今治亂不為空言既謫黃州杜門深居馳騁翰墨其文一變平生遇事所為詩騷銘記書札論議率皆過人晚喜陶淵明詩和之幾徧為人英辯竒偉於書無所不通所作文章才落筆四海已皆傳誦下至閭閻田里外至夷狄莫不知名門下賓客亦皆一世豪傑其盛古今所未有也立朝知無不言世稱其忠義嘗自比范滂孔融議者不以為過在黃州日自號東坡居士世因不呼其名止目之為東坡云

東坡別集四十六卷

陳氏曰坡之曾孫給事嶠季貞刊家集于建安大畧與
杭本同蓋杭本當坡公無恙時已行於世矣麻沙書坊
又有大全集兼載志林雜說之類亦雜以頽瀆及小坡
之文且間有訛偽勦入者有張某為吉州取建安本所
遺盡刊之而不加考訂中載應詔策論蓋建安本無應
詔集也

東坡儋耳手澤三卷 父子一卷

陳氏曰今俗本大全集中所謂志林者也艾子相傳為東坡作亦未必然按艾子蜀中和羹之物字與毅同書名艾子取悅口云爾坡又有物類相感志十八卷

東坡詞二卷

黃山谷曰東坡居士曲世所見者幾百首或謂於音律小不諧然其辭橫放傑出自是曲子內縛不住者後山詩話曰東坡以詩為詞如教坊搯木使舞雖極天下之工要非本色

東坡奏議十卷

陸游跋曰天下自有公論非愛憎異同所能奪也如東坡之論時事豈獨天下服其忠高其辯使荆公見之其有不撫几太息者乎東坡自黃州歸見荆公於半山劇談累日不厭至約卜鄰以老焉公論之不可揜如此而紹聖諸人乃遂其忤心投之嶺海必死之地何哉

烏臺詩話十三卷 東坡詩話二卷

陳氏曰蜀人朋九萬錄東坡下御史獄公案附以初舉

發章疏及謫官後表章書啓詩詞等又好事者集公雜書及詩為東坡詩話

註東坡詩四十二卷 年譜目錄各一卷

司諫吳興施元之德初與吳郡顧景蕃共為之元之子宿且為年譜以傳於世

陸游序曰近世蜀人任淵嘗註宋子京黃魯直陳無已三家詩頗稱詳贍若東坡先生之詩則援據閎博指趣深遠淵獨不敢為之說游頃與范公至能會於蜀因相

與論東坡詩慨然謂予足下當作一書發明東坡之意
以遺學者游謝不能他日又言之因舉二三事以質之
曰五畝漸成終老計九重新掃舊巢痕遙知叔孫子已
致魯諸生當若為解至能曰東坡竄黃州自度不復收
用故曰新掃舊巢痕建中初復召元祐諸人故曰已致
魯諸生恐不過如此耳游曰此游之所以不敢承命也
昔祖宗以三館養士儲將相材及官制行罷三館而東
坡蓋嘗直史館者自謫為散官削去史館之職久矣至

是史館亦廢故云新掃舊巢痕其用字之嚴如此而鳳巢西隔九重門則又李義山詩也建中初韓曾二相得政盡收用元祐人其不召者亦補大藩惟東坡兄弟猶領宮祠此句蓋寓所謂不能致者二人意深語緩尤未易窺測至如車中有布乎指當時用事者則猶近而易見白首沉下吏綠衣有公言乃以侍妾朝雲嘗歎黃師是仕不進故此句之意戲言其上僭則非得於故老殆不可知必皆知此然後無憾至能亦太息曰如此誠難

矣後二十五年游告老居山陰澤中吳興施宿武子
出其先人司諫公所註數十大編屬游作序司諫公以
絕識博士名天下且用工深歷歲久又助之以顧君景
蕃之該洽則於東坡之意蓋庶幾可以無憾矣游雖不
能如至能所托而得序斯文豈非幸哉嘉泰二年正月
五日

蘇子由欒城集五十卷 後集二十四卷 第

三集十卷 應詔集十二卷

轍字子由洵之次子也年十九中進士第二十舉直言
因所問極言得失策入或欲黜之仁宗不許擢商州推
官以兄得罪從坐謫筠州監酒宣仁臨朝相溫公擢中
書舍人代子瞻為翰林學士未幾拜尚書左丞紹聖初
責置雷州後北還凡居雷循七年居許十六年杜門理
舊學于是詩春秋傳老子解古史書皆成自謂得聖賢
遺意

陳氏曰藥城真定府縣也蘇氏望趙郡藥城元魏時屬

趙郡故云子由晚居潁上自號潁濱遺老故集或名潁濱

東坡曰子由之文實勝僕而世俗不知乃以為不如其為人深不願人知之其文如其為人故汪洋澹泊有一唱三嘆之聲而其秀傑之氣終不可沒作黃樓賦乃稍自振厲若欲以警發憤憤者而或者便謂僕代作此尤可笑是殆見吾善者機也

蘇文定公遺言二卷

周平園序略曰文定公晚居許昌避禍謝客罕與人言其間緒論者子孫而止耳然諸子宦游惟長孫將作監丞籀年十有四才識卓然侍左右者九年記遺言百餘條未嘗增損一語既老以授其子郎中君詡郎中復以授其子道州使君森予嘗與道州同僚故請題其後

龍川略志六卷 別志四卷

子由於元符二年夏居循州杜門閉目追惟平昔使其子遠書之紙凡四十事其秋復記四十七事龍川循州

地名

三蘇年表三卷

陳氏曰右奉議郎孫汝聽撰汝聽當是蜀人所敘述甚詳

三蘇遺文

陸游跋曰此書蜀郡呂商隱周輔所編周輔入朝為史官得唐安守以歸未至家暴卒可悲也

蘇過斜川集二十卷

宋史初軾卒于常州過葬之汝州郟城小峨眉山遂家
潁昌營湖陰水竹數畝名曰小斜川自號斜川居士且
以名其集其思子賦颺風賦早行於時稱為小坡云
陳氏曰蘇過字叔黨坐黨家不得仕進終於通判中山
府晁以道誌墓稱其純孝給事中嶠其孫也

九峯集四十卷

太常少卿眉山蘇元老在廷撰東坡從孫也坡在海上
嘗有書往來其罷奉常歸潁昌正坐元祐之黨未幾卒

年四十七

王子立文集

王適子立撰蘇子由之壻也。潁濱序略曰：適從予為學，長於詩騷。予自南都謫居江南，凡六年而歸，未嘗一日不相從也。既與予同憂患，至於涵泳圖史，浮屠老子之說，亦未嘗不同之。故聞道益深，為文益高，而予觀之益久。蓋其于兄弟、妻子、嚴而有恩，和而有禮，未嘗有過。故予嘗曰：子非獨余親戚，亦朋友也。

李方叔集三十卷 濟南集二十卷

李薦字方叔號月岩夾江人鄉貢進士東坡知貢舉得
試卷以為方叔置之首選已而非也賦詩有平生謾說
古戰場過眼還迷日五色之句後竟不第其母曰蘇公
知舉而吾兒下第命也所著有師友間見紀多子瞻淳
夫之遺言

木雁居士集

鄭少微字明舉華陽人少孤力學登元祐進士第始就

試禮部東坡知貢舉黃魯直與較藝得明舉由是赫然
古耶楊天惠三嵎李新皆以文名時人號為三雋按少
微在宣和間上書言時政坐廢家貧無田宅栖成都金
繩院十五年不變其守學益古文益工晚號木雁居士
有集行於世德陽舊志載少微政和中知縣事云

楊天惠文集六十卷

通志云天惠耶縣人元豐進士後入黨籍按潼川志有
楊天惠字祐甫登熙寧二年進士授雙流知縣多善政

文詞得西京體即著彰明逸事及彭山十事記者不知
同是一人否元豐熙寧年號亦相連

王君禮詩集

楊天惠曰成都王君禮自宕渠佐轉官資中嘗跨巴馬
從一野僮徑造余門持刺大呼我王某也聞子名久特
來耳因為具留之信宿而去其詩祖騷宗選出沒傳記
為兒時已能賦有州里名晚年多出白語蘄曉流俗不
以鑄琢為工

二江先生文集十六卷

元祐中雙流宋承之著南部馬涓序稱其筆端馭沓落
紙皆可諷詠在官惟以簡編筆研吟咏度日常曰世間
樂孰與此吾將終身焉

三江集 太平讜議

達州王其昌著熙寧九年進士授黔江令元豐中景靈
宮成其昌作賦獻之辭極雅麗

得得居士薏草一卷

陳氏曰右正言眉山任伯雨德翁撰其論章惇蔡卞欲廢宣仁尤切故卞深恨之獨貶嶺外按史高宗采其諫章追貶惇卞等明著誣宣仁事告天下詔贈伯雨官志云居諫省半年上一百八疏皆切國體

文與可丹淵集四十卷

文同字與可永泰人進士高第以文學名操韻高潔畫筆尤妙仕至太常博士集賢校理元豐初出守吳興至宛邱驛忽留不行沐浴衣冠正坐而逝

東坡謂與可有四絕詩一楚詞二章草三畫四世少知者惟予一見識其妙處又有詩云斯人定何人游戲得自在詩鳴草聖餘兼入竹三昧他日觀其飛白復恨知與可之不盡也

費東平詩集六卷

文同序云嘉祐癸卯春東平先生以古律五七言詩共六帙因其甥朱景副書為示且屬余以序置其首余熟讀者累日甚愛之余居常數言唐人風調涉五代衰季

已淪委而不振及見先生所作信遺音餘響久浮大空
至治世而復下今又軋然發于先生之筆舌爾按先生
閩中人少舉進士自勝冠走四方游名公鉅卿之門命
既不偶退返林壑盡諱其他能而一從事於此凡四十
年探深摘幽愈老益工大抵氣和平而意精新使人嗜
之而不厭也近世文士以篇什自名者甚衆如使先生
之言雜行于其中彼將左右顧揖相推以為先余恐先
生所得者固多傲然而獨居其前矣是可傳布於天下

也此文見丹淵集未著名氏

無為子集四十卷

楊繪元素著漢川縣竹人也幼警敏讀書一過輒誦至老不忘為文立就皇祐初擢進士第二仕天章閣待制知杭州嘗居無為山號無為子云

李公敏集

李誼伯字公敏絳州人皇祐五年進士幼孝謹長通六經歷威邛果漢四郡守贈金紫光祿大夫有詩賦三十

卷雜文二十卷其子孟侯通直郎仲侯司理叅軍政績
見神道碑銘

頤堂集

宋王灼字晦叔號頤堂遂寧人文詞古雅隱居不仕復
著有碧鷄漫志十卷糖霜譜一卷

鮮洪範長江詩集

山谷跋云余昔聞蜀人有魯三江者號稱能詩士大夫
多宗之今觀閬州鮮長江詩不甚愧之也雖切磋琢磨

之功少而渾厚之氣幾度其前矣昔方士袁天綱見閬州錦屏山題其石曰此山磨滅英靈乃絕然予在中朝唯聞陳文忠公家世出才士嘗疑山水之秀豈獨鍾於陳氏耶其沉淪草萊困頓州縣抱才器而與麋鹿共盡者可勝道哉今觀鮮長江之才所謂困頓州縣者也使之學不盡其才名不聞於世亦其鄉之先達士大夫之罪也蓋道不明於天下則士不知擇術道不行於天下則民之毀譽不公豈獨士大夫之罪哉其所從來遠矣

鮮氏唯以閬中為族姓其散漫於兩蜀者皆以閬中為祖今試問鮮氏所自出皆不能自言或云出於鮮于後去于而為鮮以余考之非是蜀李壽時司徒鮮明用事專廢立其鮮氏之祖歟

鮮于諫議集三卷

鮮于侁字子駿閬中人景祐初登進士乙科仕至諫議大夫侁治經術論著多出新意晚年為詩與楚詞尤精志稱子駿有詩傳六十卷

東坡曰鮮于子駿九誦友屈宋于千載上堯祠舜祠二章氣格高古東漢以來鮮及也

張無盡集三十二卷

張商英字天覺登第調官峽路章惇察訪巴蜀風采傾動西南峽中部使者憂之因求辯博之士以備燕談或以天覺姓名告檄召至夔州惇杯酒間果以人材為問部使者即言之惇令召入天覺不冠服峨巾長揖徑就坐左惇負氣敢大言天覺輒吐詞壓之惇大喜歸而薦

于朝由是召用元祐中為開封府推官出使河東紹聖
初擢御史大觀四年長星見蔡京罷相乃拜右僕射盡
反京之政召用元祐遷客天下翕然歸重期年去位靖
康初遂與司馬溫公范文正公同日降制加贈官爵賜
謚文忠

黃松子集十卷

唐安張唐英次公著商英之兄也進士及第殿中侍御
史

蒲左丞集十卷

蒲宗孟字傳正閬州新井人皇祐五年進士曾公亮薦
除館職神宗謂宰相曰宗孟有史才乃召同脩國史入
為翰林學士除尚書左丞卒年六十六

宋史宗孟累遷翰林學士兼侍讀舊制學士唯服金帶
宗孟入謝神宗曰學士職清地近非他官比而官儀未
寵迺加佩魚遂著為令宗孟趣尚嚴整而性侈汰藏帑
豐每旦剖羊十豕十然燭三百入郡舍或請損之愠曰

君欲使我坐暗室忍饑邪常日盥潔有小洗面大洗面
小濯足大濯足之別每用婢十數人一浴至湯五斛他
奉養率稱是嘗以書抵蘇軾云晚年學道有所得軾答
曰聞所得甚高然有二事相勸一曰慈二曰儉蓋鍼其
失也

唐子西集十卷

唐庚字子西眉山人登進士第早受知於張天覺天覺
為相擢京畿提舉欲用為諫官會天覺去位貶惠州

鴈湖李氏曰唐子西文采風流人謂之小東坡

遜菴集

丹稜唐文若著子西之子

一江集三卷

鄧至著雙流人綰之父也通六經學者從之甚衆每出入里中里中人皆拱立其尊敬之如此

廬江集七十卷 治道中術六卷十三篇


南充何涉濟川著涉於六經百家山經地志醫卜之書

無不讀景祐進士司封員外郎所著有春秋本旨雖在軍中嘗為諸將講左氏春秋狄青之徒橫經以聽司馬溫公嘗言學者讀書少能自首卷讀至卷末往往或從中或從未隨意讀起又多不能終篇光性最專猶患如此從來惟見何涉學士案上惟置一書讀之自首至尾正錯校字以至終篇未終誓不他讀此學者所難也

邊臣要略二十卷 平戎策十五篇

普州景泰周鄉著進士起家歷尚書屯田員外郎忠州

刺史有識鹽教二子相繼死王事



蜀中廣記卷九十八

欽定四庫全書

史部

蜀中廣記卷九十九
一百

詳校官編修臣翟 棟

編修臣程嘉謨覆勘

總校官庶吉士 何思鈞

校對官學正 陳 木

謄錄監生 曹錫爵

欽定四庫全書

蜀中廣記卷九十九

明 曹學佺 撰

著作記第九

集部

范蜀公集一百十二卷

汪玉山序按蜀公墓志云文集一百卷諫垣集十卷內制集二十卷外制集十卷正書二卷樂書三卷刀筆八卷公

成都人也應辰守成都凡三十年求公文集雖摻訪殆徧
來者不一而竟無全書蓋公之沒距今八十年矣竊意歲
月愈久則雖此不全之書亦或未易得也於是有意類次
為六十二卷曰樂議曰使北錄不見於墓誌亦恐其初文
集中未必載也樂議或特出於世俗所裒輯今皆存之又
以諫疏內制外制正書樂書附之通為一百十二卷正書
所得止一卷今分為二司馬溫公論正書其間有云舜無
焚廩浚井之事而今之正書無此語豈亦非全書耶

公名鎮字景仁成都人舉進士為禮部第一仁宗朝知
諫院後言王安石新法不便乞致仕居潁昌元祐初詔
召不赴封蜀郡公年八十一謚忠文

東齋紀事十二卷

景仁自序云元豐中既謝事日於東齋燕坐追憶在朝
時交游言語與夫里俗傳記因纂集成書崇觀間以其
談及國事禁之

榮國集五十卷

中書侍郎范百禄子功著鎮凡錯之子也第進士復舉
才識兼茂科

范太史集五十五卷家傳八卷 遺事一卷

翰林學士范祖禹淳夫撰鎮從孫也太史遺事後人所
編輯者

潛齋詩眼一卷

范温元實著祖禹之子學詩於黃山谷潛齋其別號云

李旼文集一百卷 歸田錄十卷 知命錄十

卷

華陽李旼渭父撰張公詠客也不樂仕進詠敦勉之遂
登第累官知榮州熙寧中致仕歸與門人賓客燕談忘
倦門人請編錄之又名該聞錄有雜詩十二篇係於後
陵陽集五十卷 陵陽先生詩草一卷 陵陽
正法眼一卷

中書舍人仙井韓駒子蒼撰自幼能詩黃太史稱其超
軼絕塵蘇文定以比儲光羲政和初獻書召試出身後

入西掖坐蘇氏鄉黨曲學罷

後村劉氏曰子蒼蜀人學出蘇氏與豫章不相接呂公
仁彊之入派子蒼殊不樂磨淬剪裁之功終身改竄不
已有寫寄人數年而追取更易一兩字者故所作雖少
而可觀

建中治本書一卷

眉山任諒子諒著年十四冠鄉書登高第為懷州教授
徽宗見其所作新學碑曰文士也擢提舉夔路學事卒

官京兆尹

張大中集

通川人宣和中舉進士羣經百氏一覽不忘時人號為
黑漆書厨以其黧色也

吳待制文集

臨邛吳時伸道著初舉進士得學究出身再試中甲科
歷太僕少卿道君時為徽猷閣待制屬文落筆即就未
嘗屬稿兩學目為立地書厨

勾景山文集十卷 西掖制書十卷 奏議十

卷

勾濤字景山成都人崇寧中登進士第史館脩撰重脩
哲宗徽宗實錄丞相趙鼎論旨宜婉辭紀載燾曰崇寧
大觀大臣誤國以稔今禍藉有隱諱如天下野史何高
宗嘗語相秦檜曰勾濤久閒性喜泉石可進職與一山
水近郡檜對永嘉有天台鴈蕩之勝帝曰永嘉太遠以
湖州命之

琴軒集一卷

陳氏曰題南榮浪翁李有慶撰與石昌言任師中同時
卷未有贈答十二絕闕其六其曰癸巳歲者殆皇祐中

岷山百景詩二卷

王寀著寀字道輔華陽人少有詩名世謂其詩初若不
經意然遣辭屬意清麗絕人自號南陵居士宣和中以
狂謫被譖伏誅

東崑野老集八十卷

建炎中唐安文正倫濟道撰漢守文翁之後也第進士
為朝請大夫生平力學為文宏贍博洽一時稱之又括
諸書重復者為小名錄

玉臺集東都事略一百三十卷

眉山王賞著當之弟稱之父也累官禮部侍郎直學士
以忤秦檜出知利州

左右氏釋疑譜學一卷 讀書日錄五卷

廣安黎良能著錚之孫也

縉雲集四十三卷

馮時行著字當可巴縣人讀書縉雲山中紹興狀元歷官奉禮郎以沮和議被廢

小醜集十二卷 續集三卷

直秘閣眉山任盡言元受撰元符諫官伯兩之孫紹興從臣申先之子中甲科仕為太常寺主簿終於閩憲揚誠齋序謂其詩文孤峭而有風稜雄健而有英骨忠慨而有義氣蓋將與唐之貞元元和本朝之慶歷元祐諸

公並轡而先終非近世陳陳相因累累隨行之作也

宇文肅愍公文集

贈開府儀同三司宇文虛中撰後溪劉氏序略曰公羈
絕域者十五年而朝廷悉發其家人北去後四年父子
謀覺而闔門被禍矣公弟兄早以才雋皆致位二府公
之文章又最見稱於當世余讀其為館職時所與開封
尹論事書而壯之使充是書以往足以追古人而並駕
公既亟見用於尚文之日潤色太平黼藻休烈則余所

謂繫一時所遇而作非公之所欲充而不已者也故公
答曾晦之書云僕長而游太學為科舉所使及得一官
又屢為應制代言之文皆非得已而為者去歲得罪杜
門於此閒取篋中書史卧而讀之日盡數卷乃知古人
之未嘗為文也惟其無意於為文而遇事乃言則其優
游舒泰奮迅豪蕩蓋無施而不可昔嘗謂西漢制詔妙
絕於元成間而章疏奏對至谷子雲而工極無以復加
矣迨今思之則不然惟高帝立長沙王令諸吏善遇高

爵及省賦舉賢等詔呂后孝文賜匈奴單于書楚王信
以下上尊號相國何等議天子所服此等數篇卓然渾
成非司馬相如王褒輩冥搜巧繪所能至也公之此書
至論古之人成德為行隱然出處之大致亦非有意於
其間又觀所與趙慶長論文書亦曰不若清明寥邈之
為愈也挺臣欲表其先大父之文即二書所言余又何
加焉

劉韶美詩集

普州劉儀鳳著登進士十年始赴調為蓬溪尉歷官國
史編脩秘書少監兵部侍郎奉入半以儲書凡萬餘卷
國史錄無遺者御史論其私錄四庫書斥歸儀鳳苦學
至老不倦尤工於詩

老學菴筆記云劉韶美在都下累年不以家行得俸專
以傳書書必三本雖數百卷為一部者亦然出局則杜
門校讎不與客接既歸蜀亦分作三船以備失壞已而
行至秭歸新灘一舟為灘石所敗餘二舟無他遂以歸

普慈築閣貯之

虞雍公詩文十卷

虞允文字彬甫仁壽人建炎紹興間出入將相垂二十年忠勤不二嘗注唐書及五代史藏於家又有經筵春秋講義奏議內外制行於世謚忠肅封雍國公

後溪劉氏曰余讀雍國忠肅虞公奏議二百二十有七篇而慨然有感世但知采石之戰以七千卒卻金兵四十萬其功甚偉然忌者猶曰適然豈知公於紹興辛巳

之前已因輪對面奏金必叛盟兵必分五道正兵必出
淮西竒兵必出海道宜令良將勁卒備此二境其先事
之識已絕出乎衆人之表矣及金叛盟上令從臣集議
公獨言金兵必出兩淮丞相善其言而未必行及遣公
勞師采石事已大壞公以書生收合亡卒激勵諸將施
置於倉卒之際而破金於俄頃之間嗚呼非胸中素所
蓄積忠誠足以動天地感人心而作士氣未易成此偉
績也而曰適然可乎自昔狃勝者必忽其餘憂公又令

設備於瓜洲其他區畫悉各精密而不苟金遂遁去乃徐請車駕還行都皆歷歷見於奏疏也余切妄論本朝多議論少成功雖盛時猶然也况積習消靡之餘夫入皆喜逸而惡勞圖安而懼危中興以來前有張魏公後有虞雍公為國家任其勞當其危者也被不少愧焉而又忍短毀之乎

張君說文集二十卷

綿竹張咸著咸字君說登元豐進士元祐初詔復六科

哲宗親擢第一卒官成都節度判官其於學六藝百家
歷代文史無不該貫為文長於序事稽古証今披文相
質歷歷可觀即張魏公之父也

張忠獻文集十卷 奏議二十卷

張浚字德遠綿竹人靖康進士孝宗時力主恢復拜尚
書僕射同中書門下平章事兼樞密使卒贈魏國公謚
忠獻所著又有詩解尚書解等書

南軒文集三十卷 奏議十卷

侍講廣漢張棻敬夫撰忠獻公之長子當孝宗朝以任
子不賜第八西掖者韓元吉劉孝綽其入經筵則棻也
別著有詩說尚書說義又有語錄十二卷蔣邁所記

沂庵集四十卷

註山谷詩二十卷

註後山

詩六卷

新津任淵子淵撰紹興元年乙丑類試第一人仕至潼
川憲嘗註山谷後山詩行於世新津有天社山故稱天
社任淵也

梯雲集三十卷

趙逵撰逵字莊叔別號梯雲內江人讀書數行俱下尤好聚古書紹興辛未對策第一他日高宗謂曰秦檜日薦士未嘗一語及卿以此知卿不附權貴真天子門生也帝又謂逵文章似蘇軾稱為小東坡

于湖集四十卷

中書舍人張孝祥安國撰甲戌冠多士出思陵親擢秦相孫墳遂居其下秦忌惡之以他事下其父子大理獄

明年秦卒上既素眷不五年登法從阜陵尤眷之卒年纔四十餘上嘗有用不盡之嘆其文翰皆超世才也原簡池人徙居歷陽因號于湖

捫膝先生文集十四卷

尚書郎三嵎喻汝礪撰後溪劉氏序略曰靖康之難金議立偽楚以絕民望先生捫其膝曰此膝豈可屈哉即日挂冠神武門遂自號捫膝居士由是名重海內先生之於學不古不好於文不古不嗜於事不古不愜故其

餘名節不古不止也既沒六十三年而文集始出嗚呼
此豈如時花候禽可悅一時耳目之比宜其愈久而愈
難泯也蓋先生之文一字不肯苟於下筆每篇率能馳
騁上下濤起阜湧力有餘而氣不竭辭既工於理與事
又欲明白而深切其得無傳乎

觀堂集

合江劉望之著紹興進士宰相沈該薦其文無塵埃氣
召除學官遷秘書省正字

畏叅集

廣安游桂著隆興進士其學主窮理盡性卒官制置機

宜文字

毛伯玉集

瀘州毛璞著乾道中進士仕至利州路所著有三餘錄

六經解自號方山子

蒲江集一卷

永嘉盧祖臯申之撰樂章甚工

方州集五十卷後集二十卷

資陽李石知幾撰石有盛名於蜀少嘗客蘇符尚書家
紹興末為學官乾道中為郎歷麾節皆以論罷趙丞相
雄其鄉人也素不善石石以是晚益困其自序云宋黜
魯倉今猶古也

李知幾主石室四方從學之士如雲其題名者至三千
人他日送其姪浩成都學官詩云我集四庫書琬琰藏
洛河此外有石經參酌正舛訛亦可以見當日收藏之

盛也知幾又有續博物志二卷開成承詔錄二卷世系
手記一卷樂善錄十卷傳於世

許沆文集三十卷

沆瀘州人累官太府少卿性至孝該博能文有章奏賦
詠雜著凡三十卷與里人史扶同以詩鳴號瀘南詩老

兼山集四十卷

端明學士劔門黃裳文叔撰裳乾道進士為嘉王府翊
善在邸最久備盡忠益甲寅御極方將大用以病不能

朝士論惜之別著有春秋講義

杜起莘文集

殿中侍御史杜莘老起莘撰杜少陵之後也後溪劉氏序略曰公學術之正文辭之典氣節之剛與王龜齡大略相似而公奮起孤遠為尤難余嘗得公奏疏而讀之其言五穀藥石也公卒四十餘年余守眉陽又得公他文閱之嘆曰善哉窮之言達之行也今年又得公經論千餘篇信乎公之學得於孟子者歟世益降士之為文

益浮噫無復斯文也已

桃溪集一百卷

崇慶州李繁清叔著歷官太府少卿講學臨政皆有源委所著書凡十八種失其名

浩齋退稿四十卷

飛鳥楊子謨伯昌著淳熙七年就外省試胡文靖得其文以為有格君氣象入對擢甲科著五要七目皆時務蜀帥楊輔以聞召對留棘寺半年所薦蜀士知名者四

十人

毫芒集

石正著本眉人徙居江安登淳熙進士力學不倦尤工書有黃庭經法自號曰啖齋

性善堂文集

合州度正周卿著紹熙進士歷官禮部侍郎同脩國史李全將反在朝諸臣知之多不敢言惟正極論之且獻斃全之策

前溪集

劉涇字巨濟別號前溪簡州人張雨撰中岳外史傳云
米元章平生與游率天下士蜀郡劉涇長安薛紹彭好
奇尚古是其一流人也

後溪集十卷 崔林詞一卷 山堂疑問一卷

劉光祖著字德修號後溪一號山堂巨濟之子官華文
閣學士謚文節

王景文名臣奏議

景文名質號雪山富川人所著奏議質文甚奇

李文簡公集一百二十卷 巽岩奏議三十卷

敷文閣學士丹稜李燾仁父撰葉水心序曰自有文字
以來名世數十大抵以筆勢縱放凌厲馳騁為極工風
霆怒而江河流六驥調而八音和春輝秋明而海澄嶽
靜也高者自能餘則勉而效之矣雖然此韓愈所謂下
逮壯騷其上無是也觀公大篇詳而正短語簡而法初
未嘗藻黼琢鏤以媚俗為意曾點之瑟方希化人之酒

欲清又非以聲色臭味自怡悅也獨於古文墜學堂上
之議起虞造周如挈裘領振之焉固遺其下而獨至其
上者歟蜀自三蘇死公父子兄弟後起兼方合流以就
家學綜練古今名實之際有補於世天下傳以繼蘇氏
云志稱巽嵒所著又有五經傳授一卷易學大傳雜說
五卷詩譜三卷尚書百篇圖一卷併文集通鑑奏議凡
三百餘卷

李壁鴈湖集消塵錄中興奏議內外制援毫錄

臨汝閒書共數百卷

壁字季章燾之第三子官資政殿學士嗜學如饑渴羣
經百氏搜抉靡遺尤習典章制度卒謚文懿壁弟稟所
著有悅齋集十卷續漢官儀二卷季章謫居臨川時註
荆公詩十五卷曾景建魏鶴山序

鶴山文集一百卷

蒲江魏了翁字華父年數歲日誦千言過目不再覽時
稱神童登慶元進士召試學士院遷校書郎補外知嘉

定府韓侂胄誅朝廷收召諸賢了翁與焉會丁生父憂
解官心喪築室白鶴山下授徒學者稱為鶴山先生卒
贈太師謚文靖傳言了翁所著九經要義凡二百餘卷
又有井田圖說一卷師友雅言數十卷

讀書日記二十卷 雜藁十卷

魏文翁著蒲江人登慶歷進士知敘州府別號果齋了
翁之弟也

縮印類稿三十卷

蒲江高稼南叔著魏了翁之兄也高乃了翁本姓魏者
從出繼云稼登嘉定七年進士闕外四州安撫司公事
措置元兵下沔州死節謚曰忠子斯得號恥堂有恥堂
文集及詩膚說李心傳領史事辟為史館累官叅知政
事稼弟定子登嘉泰進士官至學士博通六經所著有
北門類藁

李舜臣文集三十卷 鏤玉餘功錄二卷 江

東十鑑一卷

舜臣字子思井研人四歲知讀書八歲能屬文稍長通古今推迹興廢洞見根本慨然有志於天下中乾道二年進士遷宗正寺主簿重脩裕陵玉牒當曾布呂惠卿初用必謹書或謂非執政除免格不應書舜臣曰治忽所關何可拘常法他所筆削類此子性傳道傳心傳皆以家學顯世有陵陽李氏東窻李氏井研李氏之稱褒然為一代儒宗以性傳官二府贈太師追封崇國公史稱所著又有羣經講義八卷尚書小傳四卷

李心傳詩文一百卷 道命錄五卷 辨南遷

錄一卷 朝野雜記甲乙集四十卷 舊聞証

誤十五卷 誦詩訓五卷

心傳字微之舜臣第三子也慶元年薦於鄉既下第絕意不復廷舉閉戶著書晚因崔與之許奕魏了翁等合前後二十人薦自制置司敦遣至闕下為史館校勘進士出身專修中興四朝帝紀甫成其二添差通判成都府尋遷著作佐郎兼四川制置司叅議踵修十三朝會

要端平三年成書召赴闕為工部侍郎

存容集十卷

井研牟子才存容著舉進士對策詆史彌遠調洪雅尉
有詔李心傳即成都修四朝會要及中興國史辟兼檢
閱文字以資政殿學士致仕卒史稱所著又有四尚易
篇春秋輪輻內外制奏議經筵講義口義故事等書

師伯渾文集

山陰陸游序曰乾道癸巳予自成都適犍為識隱士師

伯渾於眉山一見知為天下偉人予既行伯渾餞予於
青衣江上酒酣浩歌聲搖江山水鳥皆驚起伯渾飲至
斗許予素不善飲亦不覺大醉夜且半舟始發去至平
羌酒解得大軸於舟中則伯渾醉書紙窮墨燥如春龍
奮螫竒鬼搏人何其壯也後四年伯渾得疾不起余懷
祖集伯渾文章移書走八千里乞予為序嗚呼伯渾自
少時名震秦蜀東被吳楚一時高流皆尊慕之願與交
方宣撫使臨邊圖復中原制置使并護梁益兵民皆巨

公大人間伯渾名將聞於朝而卒為忌者所沮夫伯渾
既決不肯仕即無沮者不過有司歲時奉粟帛牛酒勞
問極則如孔攸徐復輩加散人號書其事於史而已於
伯渾何失得而忌之如此鄉使伯渾出而事君為卿為
公則忌者當益衆排擊沮撓當不遺力徙比景翰左校
殆未可知安得如在眉山躬耕婦織放意山水優游以
終天年耶則伯渾不遇未見可憾也

歸去來文

青神社叔才著魏文靖公跋云三馬食曹叔夜有宜去
之書一龍禪宋淵明興歸來之嘆然從容不迫若將微
罪行者視叔夜之誇直而輕愠殆有間矣史載淵明之
去在義熙三年以其時考之蓋宋高祖殺劉仲文之歲
昭明所謂耻復屈身異代者為得其心夫豈以一督郵
為此悻悻哉而古今罕有能發之者杜君此文作於蜀
盜未平之日其尚淵明之心乎了翁嘗嘗守君之郡不
及識君嘉定十五年九月邂逅其子安石於臨安始見

是作因推本昔人所未發者識諸篇末而歸其書於杜氏

老圃遺文

青神楊虞仲著魏了翁序曰人言尚辭章者乏風骨尚氣節者窘辭令某謂不然辭章雖末技然根於性主於氣發於情止於道非無本者能之且孔明之忠忱元亮之進退不以文辭自命也若表若辭肆筆落口無復雕繪之工人謂可配訓誥雅頌此可強而能哉唐之辭章

稱柳韓元白而柳不如韓元不如白則皆於大節觀之
蘇文忠論近世文章之浮靡無如楊大年而大年以文
名則以其忠清鯁亮大節可考不以末技為文也眉山
自蘇長公以辭章自成一家歐尹諸公賴之以變文體
後來者相望人知蘇氏為辭章之宗也孰知其忠清鯁
亮臨死生利害而不易其守此蘇氏之所以為文也老
圃楊公自盛年射策甲第直聲勁氣響撼當時有文忠
之遺風迨其觀風作牧風裁清峻屢詔不入老不待年

徜徉泉石幾二十載蜀人高其風某之生後猶及拜公
又辱與公之季子大理少卿叔正為友叔正甚似其先
人諤諤朝端言人所不敢言叔正既卒公之諸生哀老
圃遺文若干卷鋟諸梓請予敘所以作嗚呼世俗狹隘
矜力炫才言語以為華富貴以為事求其脫然聲利之
場如公者既不可得今觀公退休以後之文猶多雍雅
自得之趣蓋辭心之聲也易曰脩辭立其誠辭非易能
所以立誠也公居官以不欺名堂自號不欺子則其為

辭之本既在此是宜其發越著見非浮嫵纖麗者可同年語也後之賢者當於是考德焉公名虞仲字少逸眉之青神人晚號老圃出處顛末見諸不欺子自志云

克齋文集

楊泰之叔正著虞仲之子也少刻志於學十年卧不設榻宣撫使安丙疏曰蜀中名儒楊虞仲之子當逆曦變時勉有位者毋動言不用拂衣而去使得尺寸之柄必能見危致命卒官大理少卿知重慶府奉祠史載叔正

所著有詩名物編及大易要言

平舟文集崇道集

青神楊棟元極著紹定中進士歷樞密院編脩官史謂其學本於周程負海內望獨以彗星為蚩尤旗為世所少云卒官叅知政事

見山集

楊文仲時發著棟之從子也七歲而孤以胄試入太學升內舍時言路壅塞因李冬雷震率同舍叩閣言時事

有曰天本不怒人激之使怒人本無言雷激之使言一時傳誦之寶祐初登進士恭宗即位權侍郎兼給事中元兵渡江朝士多棄去者侍從班惟文仲一人

鈍齋集六十卷

著作郎楊濟濟道撰淳熙五年進士京鏜帥蜀上已出遨濟為樂語首云三月三日豈無水邊麗人一詠一觴亦有山陰禊事又云良辰美景賞心樂事四者難并崇山峻嶺修竹茂林羣賢畢至一時傳誦京為相召入館

出知果州以終

懷親詩十三篇

何麗天著南充人宦游中都久未得歸賦懷親十三篇
如毛詩體隨表上進以求外補朝廷嘉其志因詔嶺南
遠官皆許迎養

晶然集

廣安安丙子文著初第進士知大安軍辟吳曦隨軍轉
運以誅曦功進資政大學士四川制置使

方山集四卷

蒼溪嚴大猷著吳曦僭蜀大猷憤而作詩有笏未到身
難擊此兵如入手易擒吳之句特奏授隆慶司李叅軍
方山在縣東八十里大猷所居近之故以名集

亨泉遺藁一百卷

四川制置叅議張方著方字義立資陽人登慶元進士
號亨泉子三作州持節所在有聲

何炎寅集

炎寅通江人嘉定間舉進士綽有時名舊志列於著作
橘洲文集續言行錄奏藁共十三卷

潼川姚希得逢原著一字叔剛登嘉定進士歷端明學
士太子賓客史稱其清儉自持好引善類不要虛譽有
薦誦於上久而人莫知者

鶴林集

潼川吳泳叔永著嘉定二年進士歷著作郎讀書於州
鶴林寺故以名集杜甫所謂牛頭望鶴林也弟即昌裔

吳季永集 苦言十篇

昌裔字季永第進士歷秘閣修撰多習典故與徐清叟
杜範同日入臺四方想其風采作三諫詩侈之苦言則
通判眉州時作也

塵缶文集內外制奏議掖垣繳奏金華講議

宣化程公許著字季與一字希穎第嘉定進士歷國史
編脩實錄檢討忤鄭清之出知隆興府晚年惟一僮侍
食無重肉一裘至十數年不易家無羨儲蜀方兵難族

姻奔東南者多依公許以居

許學士奏議雜文

簡州許奕著奕字成子以任為涪城尉寧宗親擢進士
第一歷寶謨閣學士論諫甚多帝稱其骨鯁提舉崇福
宮還家草遺表曰本非衰病初染微疴當湯熨可去之
時臣以疾而為諱及鍼石已窮之後醫束手而莫圖靜
言膏肓所致之由大抵脈絡不通之故寓諷諫焉性孝
友通籀隸所著有毛詩說論語尚書周禮講解及文集

行于世

歸全錄

巴縣母夢牛著咸亨中進士屢主試院仕終承直郎

歲雲山集相鋤集

普州張山翁著景定中進士為荊州宣慰幹官元兵臨
鄂守張晏然降山翁以書嚆讓之遂被執山翁酬對不
屈元人義之後居黃鵠山聚徒教授而終見宋史家鉉
翁傳

蟠龍集

蜀僧希演著東坡東云蒙惠蟠龍集向已盡讀數冊迺
文筆力奇健深增歎服僕嘗觀貫休齊己詩尤多凡陋
而遇知得名赫奕如此蓋時文凋弊故使此二僧為雄
強今吾師老於吟詠精敏豪放而汨沒流俗豈亦有幸
不幸耶然此道固亦澹泊寂寞非以蘄人知而鼓譽也
但鳴一代之風雅而已既承厚貺聊奉廣耳

女子王安之詩一卷

簡池王允之女名安之未嫁而死有詩一卷

鄧文肅集

元綿州鄧文原著仕集賢直學士兼國子祭酒謚文肅志稱其博學能詩僉浙西廉訪事多異政人以為神

道園學古錄

虞集仁壽人隨父汲徙居臨川天性孝友弘才博學累遷奎章閣學士日取經史中切心德治道者陳進經筵凡承顧問必隨事規諫而一時大典冊咸出其手其論

薦人才必先器識平生為文萬篇有道園學古錄行世
卒贈仁壽公謚文靖子安民知安福州弟槃著非非國
語行於世

寵溪詩集

元支渭興著長寧人至順間仕四川行省叅政寵溪其
別號也

賈先生集

賈長卿涪州人有文學凡使蜀還京者人必問曰得賈

先生文章否題觀瀾閣歌撰文廟御碑記鄉人重之

雲山詩集

璧山縣有雲山翁者力學豪放不著姓名結廬於五峰山下明玉珍以萬戶詔之不起有雲山集行世

導江先生文集

灌縣張湏著元末避亂僑居江左潛心道學至元中行臺中丞吳曼慶延至江寧遠近翕然師之稱導江先生有經說及文集行於世

泉石子詩文

納谿蕭子雲善詩文偽夏屢徵不就避跡紫圉谷中號
泉石子有詩行世

蜀中廣記卷九十九

欽定四庫全書

蜀中廣記卷一百

明 曹學佺 撰

著作記第十

集部宦遊于蜀及蜀中所輯刻者

諸葛氏集二十四篇

晉陳壽表曰臣前在著作郎侍中領中書監濟北侯臣荀勗中書令關內侯臣和嶠奏使臣定故蜀丞相諸葛

亮故事亮毘佐危國員阻不賓然猶存錄其言耻善有遺誠是大晉光明至德澤被無疆自古以來未之有倫也輒刪除複重隨類相從凡為二十四篇篇名如右亮少有逸羣之才英霸之器身長八尺容貌甚偉時人異焉遭漢末擾亂隨叔父玄避難荊州躬耕于野不求聞達時左將軍劉備以亮有殊量乃三顧亮於草廬之中亮深謂備雄姿傑出遂解帶寫誠厚相結納及魏武帝南征荊州劉琮舉州委質而備失勢衆寡無立錫之地

亮時年二十七乃建奇策身使孫權求援吳會權既宿服仰備又覩亮奇雅甚敬重之即遣兵三萬人以助備備得用與武帝交戰大破其軍乘勝克捷江南悉平後備又西取益州益州既定以亮為軍師備稱尊號拜亮為丞相錄尚書事及備殂没嗣子幼弱事無巨細亮皆專之于是外連東吳內平南越立法施度整理戎旅工械技巧物究其極科教嚴明賞罰必信無惡不懲無善不顯至于吏不容奸人懷自厲道不拾遺強不侵弱風

化肅然也當此之時亮之素志進欲龍驤虎視包括四海退欲跨陵邊疆震蕩宇內又自以為無身之日則未有能蹈涉中原抗衡上國者是以用兵不戢屢耀其武然亮才于治戎為長竒謀為短理民之幹優于將略而所與對敵或值人傑加衆寡不侔攻守異體故雖連年動衆未能有克昔蕭何薦韓信管仲舉王子城父皆恃己之長未能兼有也亮之器能政理抑亦管蕭之亞匹也而時之名將無城父韓信故功業陵遲大義不及邪

蓋天命有歸不可以智力爭也青龍二年春亮帥衆出武功分兵屯田為久駐之基其秋病卒黎庶追思以為口實至今梁益之民咨述亮者言猶在耳雖甘棠之詠召公鄭人之歌子產足以遠譬也孟軻有云以逸道使民雖勞不怨以生道殺人雖死不怨殺信矣論者或怪亮文彩不豔而過于丁寧周至臣愚以為咎繇大賢也周公聖人也考之尚書咎繇之謦略而雅周公之誥煩而悉何則咎繇與舜禹共談周公與羣下矢誓故也亮

所與言盡衆人凡士故其文指不得及遠也然其聲教遺言皆經事綜物公誠之心形于文墨足以知其人之意理而有補于當世伏惟陛下邁蹤古聖蕩然無忌故雖敵國誹謗之言咸肆其辭而無所草諱所以明大通之道也

諸葛氏集目錄

開府作牧第一

權制第二

南征第三

北出第四

計筭第五

訓勵第六

綜覈上第七

綜覈下第八

雜言上第九

雜言下第十

貴和第十一

兵要第十二

傳運第十三

與孫權書第十四

與諸葛瑾書第十五

與孟達書第十六

廢李平書第十七

法檢上第十八

法檢下第十九

科令上第二十

科令下第二十一

軍令上第二十二

軍令中第二十三

軍令下第二十四

右二十四篇凡十萬四千一百一十二字秦始皇十年所

進

武侯十六策一卷

晁氏曰序稱謹進便宜十六事一治國二君臣三視聽
四納言五察疑六治民七舉措八考黜九治軍十賞罰
十一喜怒十二治亂十三教令十四斬斷十五思慮十

六陰察陳壽錄孔明書不載此策疑依託者按此板翻刻在大梁李獻吉序

郤令先序

蜀漢郤正字令先河南偃師人安貧好學博覽墳籍弱冠能屬文仕為秘書郎澹於榮利而耽意文章自司馬王揚班傅張蔡之儔遺文篇賦及當世美書善論益部有者則鑄鑿推求略皆寓目蜀亡後主東之洛陽大臣無翼從者惟正及殿中督汝南張通舍妻子單身隨侍

後主賴之所著述詩論賦之屬垂百篇其釋譏一篇詳見本傳陳壽以其可繼崔駰達旨

呂雅格論十五篇

陳壽志雅蜀尚書令呂乂之子南陽人也仕蜀為謁者清厲有文才

向朗集

蜀志朗字巨達襄陽宜城人少師事司馬德操與徐元直韓德龐士元皆親善仕諸葛丞相長史隨征漢中以

馬謖逃亡朗與之善知情不舉免還成都少時涉獵文學然不治素檢以吏能見稱自去官優游無事垂三十年乃更潛心典籍孜孜不倦年踰八十猶手自校書刊定謬誤積聚篇卷於時最多開門納賓誘納後進但講論古義而已

陶靖節年譜一卷 年譜辯證一卷 雜記一卷

陳氏曰吳仁傑斗南為年譜張縝李長辯證之又雜記

晉賢論靖節語此蜀本也季長蜀人

和陶集十卷

蘇軾兄弟追和共註

唐三百家文粹四百卷

眉山成叔陽編後溪劉氏序略曰往時有唐文粹百卷姚鉉之所銓纂已倍于古今眉山成君乃增益之至三百家為四百卷嗚呼何其多也文之多者可以察治言之富者可以觀德眉士鄉多藏書叔陽所以盡力乎其

問豈徒然哉

唐六十家集

陳氏序王右丞集云大抵蜀刻唐六十家集多異于他處

又玄集三卷

五代韋莊選唐人詩

才調集十卷

後蜀韋穀選唐人詩以李青蓮白樂天居首海虞趙玄

度有抄本

花間集十卷

陳氏曰孟蜀趙崇祚著崇祚字宏基仕至衛尉少卿其詞自溫飛卿而下十八人凡五百首此近世倚聲填詞之祖也詩至晚唐五季氣格卑陋千人一律而長短句獨精巧高麗後世莫及此事之不可曉者放翁陸務觀之言云爾歐陽炯序曰鏤玉雕瓊擬化工而迥巧裁花剪葉奪春艷以爭鮮是以唱雲謠則金母詞清挹霞醴

則穆王心醉名高白雪聲聲而自合鸞歌響過青雲字
字而偏諧鳳律楊柳大堤之句樂府相傳芙蓉曲渚之
篇豪家自製莫不爭高門下三千玳瑁之簪競富樽前
數十珊瑚之樹則有綺筵公子繡幌佳人遞葉葉之花
牋文抽麗錦舉纖纖之玉指拍按香檀不無清絕之辭
用助嬌嬈之態自南朝之官體扇北里之倡風何止言
之不文所謂秀而不實有唐已降率土之濱家家之香
徑春風寧尋越艷處處之紅樓夜月自鎖嫦娥在明皇

朝則有李太白應制清平樂詞四首近代溫飛卿復有
金荃集邇來作者無媿前人今衛尉少卿字宏基以拾
翠洲邊自得羽毛之異織綃泉底獨殊機杼之功廣會
衆賓時延佳論因集近來詩客曲子詞五百首分為十
卷以炯粗預知音辱請命題仍為序引昔郢人有歌陽
春者號為絕唱乃命之為花間集庶以陽春之曲將使
西園英哲用資羽翼之歡南國嬋娟休唱蓮舟之引時
大蜀廣政三年夏四月日序

唐章懷太子摘心辭

本傳名賢字明允數歲讀書一覽輒不忘常招集諸儒
註後漢書永隆年武后譖廢為庶人徙于巴州作黃心
辭有臺見存

王勃入蜀紀行詩

自序云總章二年五月癸卯余自長安觀景物于蜀遂
出褒斜之隘道抵岷峨之絕徑超玄谿歷翠阜迨彌月
而臻焉山川之感召多矣余能無情哉爰戒文律用宣

行唱編為三十首投諸好事者

杜工部集二十卷 年譜一卷

宋嘉祐中華陽王琪君玉刻而序之呂微仲在成都時
常為譜其年月

杜詩集註三十六卷

陳氏曰蜀郭知達所集九家註世有稱東坡杜詩故事
者隨事造文一一牽合而皆不言其所自出且其辭氣
首末出一口蓋妄人依托以欺亂流俗者書坊輒剽入

集註中殊敗人意此本獨削去之

朱晦菴曰子美自稱詩入夔而神然子美詩好處亦是
倣選詩夔州諸作不然也

杜詩補遺正謬註

宋安岳杜田撰

岑嘉州集十卷

晁氏曰岑參南陽人嘉州刺史杜鴻漸表置幕府為職
方郎中兼侍御史罷終于蜀集有杜確序

陸游曰予自少時絕好岑嘉州詩往在山中每醉歸倚
胡牀睡輒令兒曹誦之至酒醒或睡熟乃已嘗以為太
白子美之後一人而已今年自唐安別駕來攝犍為既
畫公像齋壁又雜取世所傳公遺詩八十餘篇刻之以
傳知詩律者不獨備此邦故事亦平生素意也

韋述集

本傳述京兆萬年人澹于榮利家廚書二千卷張說薦
為直學士典掌圖書祿山反述抱國史藏南山陷賊汙

偽官賊平流渝州

元子十卷 琦玕子一卷 文編十卷

陳氏曰元結次山著蜀本但載自序江州本以李商隱所作序冠其首蜀本拾遺一卷中興頌五規二惡之屬皆在焉江本分置十卷

江山集

唐咸通中汾州薛能以監郡攝嘉州刺史政暇題詠甚多編為江山集

洞庭集一卷

陳氏曰唐薛瑩撰文宗時人集中多蜀詩其曰壬寅歲者在前則為長慶四年後則為中和二年未知定何年也觀者考之

韓文公志五卷 外集一卷

陳氏曰金堂樊汝霖澤之撰汝霖嘗為韓集譜註四十卷又集其碑誌祭文序譜之屬為一編此是也外集但據嘉祐蜀本劉燧所錄二十五篇而附以石刻聯句

詩文之遺見於他集者

李文公集十卷

蜀本分二十卷有蘇舜欽序文唐李翱習之也

孟東野咸池集

晁氏曰蜀人蹇濬用退之贈郊句纂咸池集二卷凡一百八十篇東野自有集十卷

李紳追昔荐集

晁氏曰唐李紳字公垂亳州人與元稹李德裕同時號

三俊追昔游者蓋賦詩紀其生平所游歷謂起梁漢歸
諫署播越荆楚分務東州守蜀鎮梁也

賈長江集十卷

晁氏曰唐賈島浪仙詩共三百七十九首唐書稱島范
陽人累舉進士不第文宗時坐飛謗謫長江主簿終普
州司倉叅軍今長江祠堂中有石刻大中九年墨制大
中宣宗年號也與傳不合

陳氏曰韓退之有送僧無本詩無本即島也後返初舉

進士不第會昌初為普州叅軍今遂寧刊本首載大中
墨制云比者禮部奏卿風狂遂且養疾關外今却攜卷
軸潛至京城遇朕微行間卿諷詠觀其志業可謂屈人
是用顯我特恩賜卿墨制宜從短簿別俟殊科與傳所
稱飛謗不同蓋宣宗好微行小說載烏應對忤旨好事
者撰此制以實之也安有微行而顯著訓詞者乎首稱
奏卿風狂尤為好笑當以本傳墓誌為正唐貴進士科
故誌言責授長江如溫飛卿亦謫方城尉當時謂鄉貢

進士不博上州刺史則簿尉固宜謂之責授使今世進士得罪而責授簿尉則惟恐責之不早耳

元微之寄白樂天詩二十卷

時在通州與樂天書云植九歲學賦詩長者往往驚其可教年十五六粗識聲病時貞元十年已後德宗皇帝春秋高理務因人最不欲文法吏生天下罪過外閭節將動十餘年不許朝覲死於其地不易者十八九而又將豪卒愎之處因喪負衆橫相賊殺告變絡繹使者迭

窺旋以狀聞天子曰某邑將某能遏亂衆寧附願為帥
名為衆情其實逼詐因而可之者又十八九前置介倅
因緣交授者亦十四五由是諸侯敢自為旨意有羅列
兒孫以自固者有開道蠻夷以自重者省寺符篆局固
几閣甚者礙違詔旨視一境如一室刑殺其下不啻僕
畜厚加剝奪名為進奉其實貢入之數百一焉京城之
中亭第邸店以曲巷斷侯甸之內水陸腴沃以鄉里計
其餘奴婢資財生生之備稱之朝廷大臣以謹慎不言

為朴雅以時進見者不過一二親信直臣義士往往抑
塞禁省之間時或繕完隕墜豪家大帥乘聲相扇延及
老佛土木妖熾習俗不怪上不欲令有司備宮闈中小
碎湏求往往持幣帛以易爵餌吏緣其端剽奪百貨勢
不可禁僕時孩騃不慣聞見獨於書傳中初習理亂萌
漸心體悸震若不可活思欲發之久矣適有人以陳子
昂感遇詩相示吟翫激烈即日為寄思玄子詩二十首
故鄭京兆於僕為外諸翁深賜憐獎因以所賦呈獻京

兆翁深相駭異祕書少監王表在座顧謂表曰使此兒
五十不死其志義何如哉惜吾輩不見其成就因召諸
子訓責之僕亦竊不自得由是勇於為文又久之得杜
甫詩數百首愛其浩蕩洋涯處處臻到始病沈宋之不
存寄興而訝子昂之未暇旁備矣不數年與詩人楊巨
源友善日課為詩性復僻嬾人事常有閒暇間則有作
識足下時有詩數百篇矣習慣性靈遂成病蔽每公私
感憤道義激揚朋友切磋古今成敗日月遷逝光景慘

舒山川勝勢風雲景色當花對酒樂罷哀餘通滯屈伸
悲歡合散至於疾恙躬身悼懷惜遊凡所對遇異於常
者則欲賦詩又不幸年三十二時有罪譴棄今三十七
矣五六年之間是丈夫心力壯時常在閒處無所役用
性不近道未能淡然忘懷又復嬾於他欲舍盛之氣注
射語言雜糅精粗遂成多天然亦未常善寫適值河東
李明府景儉在江陵時解好僕詩章謂為能解欲得盡
取觀覽僕因撰成卷軸其中有旨意可觀而詞近古往

者為古諷意亦可觀而流在樂府者為樂諷詞雖近古
而止於吟寫性情者為古體詞實樂流而止於摹像物
色者為新題樂府聲勢宏順屬對穩切者為律詩仍以
七言五言為兩體其中有稍存寄興與諷為律諷不幸
少有伉儷之悲撫存感往成數十詩取潘子悼亡為題
又有以干教化者近世婦人暈淡眉目綰約頭鬢衣服
脩廣之度及匹配色澤尤劇怪豔因為豔詩百餘首詞
有今古又各爾體自十六時至是元和七年矣有詩八

百餘首色數相從共成十體凡二十卷自笑冗亂亦不復置之於行李昨來京師偶在篋篋及通州司馬行盡置足下僅亦有說僕聞上士立德其次立事不遇立言凡人急位其次急利最下急食僕天與不厚既乏全然之德命與不遇未遭可為之時性與不慧復無垂範之言兀兀狂癡行近四十徽名取位不過於第八品而冒憲已六七年授通之初有習通之熟者曰通之地濕墊卑褊人事稀少近荒札死亡過半邑無吏市無貨百姓

茹草木刺史以下計粒而食大有虎蠹虵虺之患小有
蝮蚋浮塵蜘蛛蝮蜂之類皆能鑽嚙肌膚使人瘡痂夏
多陰靈秋為痢虐地無醫巫藥石萬里病者有百死一
生之慮夫何以僕之命不厚也如此智不足也又如此
其所詣之憂險也又復如此則安能保持萬全與足下
必復京輦以須他日立言事之驗耶但恐一旦與急食
相扶而終使足下受天下友不如己之誚是用悉所為
文留穢箱笥比夫格奕擣塞之戲猶曰愈於飽食僕所

為不又愈於格奕擣塞之戲乎昨行巴南道中又有詩
五十一首文書中得七年已後所為尚二百篇繁亂冗
雜不復置之執事前所為寄思元子者少歲云為文不
能自足其意貴其起予之始且志京兆翁見過之由今
亦寫為古諷之一移諸左右僕少時受吹噓之術於鄭
先生病嬾不就今在開處思欲怡神保和以求其病異
日亦不復費詞於無用之文矣省視之煩庶亦已於是
乎

白長慶集五十卷 年譜一卷

陳氏曰蘇本蜀本編次不同知忠州漢嘉何友諒以樂天舊治既刊其文集又作年譜刻之集首云始予為譜既成妹夫王泳叔永守忠錄寄之則忠已有此譜視予譜詳略互見亦各有發明

李觀後集二卷

晁氏曰唐李觀元賓貞元八年進士中宏詞科終太子校書郎為文不襲前人時謂與韓愈相上下者有文編

三卷外集二卷其後蜀人趙昂又得其安邊書至晁錯論一十四首為後集二卷

李洞集

洞字才江京兆人唐諸王孫也慕賈島為詩因入蜀以銅鑄浪仙像事之如神昭宗時不第還蜀卒

陸龜蒙笠澤叢書四卷

陳氏曰叢書為甲乙丙丁詩文雜編政和中朱衮刊之吳江末有四賦用蜀本增入蜀本七卷邨人樊開所序

辯謗略三篇

唐開州刺史唐次在任十年不遷乃撰辯謗略三篇上之改夔州憲宗立召還

薛洪度詩一卷

薛濤字洪度工為詩當時名人多與酬贈武元衡奏為校書郎太和中卒李肇云樂妓而工詩者濤亦文妖也

韋莊浣花集五卷 牋奏四卷

晁氏曰偽蜀韋莊字端己仕王建至吏部侍郎平章事

集乃其弟藹所編以所居即杜甫草堂舊址故名偽史稱莊有集二十卷今止存此

王錯集

前蜀王氏朝偽相王錯字鱣祥家藏書數千卷一一皆親札并寫藏經每趨朝於白藤擔子內寫書書法尤謹

張蠟詩一卷

晁氏曰偽蜀張蠟字象文清河人唐乾寧中進士為校書郎櫟陽尉犀浦令王建開國拜膳部員外郎後為金

堂令王衍與徐太后遊大慈寺見壁間書墻頭細雨垂
織草水面迴風聚落花愛之問知蠩句給札令以詩進
蠩以百首獻衍頗重之將召為知制誥宋光嗣以其輕
傲止賜白金而已蠩生而穎秀幼能為詩作中有與韋
莊杜光庭貫休詩唐末三人皆在蜀疑其同時避亂入
蜀云

寶月詩一卷

晁氏曰唐僧貫休撰字德隱姓姜氏婺州人後入蜀號

禪月大師初吳融為之序其弟子曇域削去別為序引
偽蜀乾德中獻之

盧延讓詩一卷

晁氏曰偽蜀盧延讓子善范陽人唐光化九年進士為
朗陵雷滿所辟滿敗歸王建及建僭號授水部員外郎
累遷給事中卒官刑部侍郎延讓師薛能詩不尚奇巧
人多謂其淺俗獨吳融以其不蹈襲大奇之

牛嶠歌詩三卷

晁氏曰偽蜀牛嶠字延峰隴西人唐相僧孺之後博學
有文以歌詩著名乾符五年進士歷拾遺補闕尚書郎
王建鎮西川辟判官及開國拜給事中卒集本三十卷
自序云竊慕李長吉所為歌詩輒效之

出麾小集 西州猥藁

宋祁出守益州所著晁氏曰景文通小學故其文多奇
字蘇子瞻稱其集淵源皆有考奇險或難句

張忠定公語錄四卷

晁氏曰張詠守蜀有善政門人李旼紀其語論可以垂世者

三好詩三十章

閬州志載熙寧中遂寧守向公著遂寧好十章寄閬守
鄭公申鄭答以南隆好十章薛奎為成都太守亦有春
遊好十章

忠嘉集

宋汝為著汝為豐縣人建炎初使諭劉豫為兀朮所得

亡歸秦檜將械送於金以脩好乃徒步遁入蜀青城山而卒

清獻集三卷

趙抃字閱道為蜀中御史琴鶴自隨有詩集三卷刻在成都

西征小集

范成大著陸游序曰石湖居士范公待制敷文閣來帥成都兼制置成都潼川利夔四道成都地大人衆事已

十倍他鎮而四道大抵皆帶蠻夷且北控秦隴所以臨
制捍防一失其宜皆足致變故於呼吸顧盼之間以是
幕府率窮日夜力理文書應期會而故時巨公大人亦
或不得少休及公之至也定規模信命令弛利惠農選
將治兵未數月聲震四境歲復大登幕府益無事公時
從其屬及四方之賓客飲酒賦詩公素以詩名一代故
落紙墨未及燥士女萬人已更傳誦被之樂府弦歌或
題寫素屏團扇更相贈遺蓋自蜀置帥守以來未有也

或曰公之自桂林入蜀也舟車鞍馬之間有詩百餘篇
號西征小集尤雋偉蜀人未有見者盍請於公以傳屢
請而公不可彌年乃僅得之於是相與刻之而屬某為
序淳熙三年上巳日

趙秘閣文集

陸游序曰漢孝武帝好文淮南王安以高帝孫為諸侯
王而學問文辭在漢庭諸儒甲乙中其所著大小山至
與雅頌離騷並魏陳思王唐太白長吉則又以帝子及

諸王孫落筆妙古今冠冕百世河出崑崙墟首四瀆經
天下以入于海彼源委固自不同無足異也宋興宗室
深居宮中不與外庭接故雖博學軼材不得著見然以
詩文飛白書詔藏秘府者亦不乏人熙寧元豐間始與
羣臣並進于朝積數十年而德麟伯山屬文英妙寔見
推於諸公間矣漢王五世孫秘閣公諱不拙字若拙少
以進士奮主司及流輩皆伏其工初家貧無以養乃教
授諸生以自給其勤苦殆有非窶人子所堪者既得第

猶不廢也晚入蜀為州遂持使者節學益不厭文益妙
予行南充閬中小益至成都歷山郵津亭及浮屠老子
之廬見穹碑巨版多公遺文每觀之至忘食已而尚書
孫公仲益端明汪公聖錫侍御王公龜齡文益出於世
往往見公名字於其間許與甚至然後知天下自有公
論也公之子善發善零皆取世科善發字正己尤以文
學稱其為漢州判官也囊公之文萬里請予於山陰澤
中曰願有以冠篇右顧公平生知已久已凋落予材下

徒以後死不得讓媿可量哉慶元六年三月丁巳

王荆公詩註十五卷

陳氏曰叅政眉山李壁季章謫居臨川時所作也魏鶴山序

黃山谷詩註二十卷

陳氏曰新津任淵子淵註鄱陽許尹序大抵不獨註事而兼註意用工為深

劔南詩彙續彙八十七卷

華文閣待制山陰陸游務觀撰游左丞佃之孫也紹興
未召對賜出身隆興初為密院編脩官鄉用矣坐漏泄
省中語阜陵以為反覆斥遠之後以夔倅入蜀益自放
肆不護細行自號放翁在蜀九年乃歸

陸游東樓集詩

自序余少讀地志至蜀漢巴嶮輒悵然有遊歷山川攬
觀風俗之志私竊自怪以為異時或至其地以償素心
未可知也歲庚寅始泝硤至巴中間竹枝之歌後再歲

北游山南憑高望鄂萬年諸山思一醉曲江漢陂之間
其勢無繇往往悲歌流涕又一歲客成都唐安又東至
于漢嘉然後知昔者之感蓋非適然也到漢嘉四十日
以檄得還成都因索在筭得古律三十首欲出則不敢
欲棄則不忍迺叙藏之乾道九年六月二十一日

昭德晁公文集六十卷

四川制置使侍郎晁公武子止撰後溪劉氏序略曰國
家丙午之變中原衣冠不南渡則西入于蜀其入于蜀

有能言當時理亂興喪之由而明乎得失之跡歷歷道
往事誦京洛之遺風者鮮矣藉令有之而能達之乎文
辭可使耳目尚接乎而後之人有傳焉者亦又鮮焉昭
德晁公蓋能言當時理亂興喪之由而明乎得失之跡
道往事誦遺風而又能達之乎文辭以傳焉者也其經
事之多嘗艱之久而學日益強文日益力猶以為未足
其答進士劉興宗書曰僕少時貫穿羣書出入百氏旁
逮釋老恢詭之學一再終星其勤亦至矣亡得焉反而

求之六藝似於道有見也乃願師董仲舒心竒賈生而病其雜也則公之學可觀矣

晁氏具茨集三卷

晁冲之叔用著乾道間其子公武為四川安撫制置翻刻于成都喻汝礪序云予嘗從叔用商近朝人物嘉言善行朝章國典禮文損益靡不貫洽由叔用之學而達諸廊廟温厚足以代言淵博足以顧問則以詩鳴者是豈叔用之志也哉雖然叔用既已油然棲志於林澗曠

遠之中遇事寫物形於興屬淵雅疎亮未嘗為悽怨危
憤之音予於是見叔用於消長用舍之際未嘗不
安而樂之者也嗟乎所謂含章內奧而深於道者非耶
秦漢以來士有抱竒懷能流落不遇往往操心汗筆有
怨誹沉抑之思氣候急刻不能間遠古之詞人皆是也
所以往往無所建立於天下唯深於道者遺於世而不
怨發於詞而不怒君子是以知其必能有為於世者也
嗟乎吾於叔用豈直以詩人命之哉

晁文元集二十一卷

晁公武曰予五世祖文元公諱迥字明遠澶州人也自公徙家彭門登太平興國五年進士以太子少保致仕終少傅年八十四謚文元集皆自有序自經兵亂六世圖書焚棄無子遺法藏碎金十卷世傳最廣先得之于趙郡蘇符昭德新編三卷則得之于丹校李燾道院集要十五卷則得之于知閬州王輔耄智餘言三卷則得之于眉山程敦厚云

呂東萊集二十卷

汪玉山曰應辰頃知成都始得東萊呂正獻公著集蓋散逸之餘裒輯補綴非當時全書矣然見所未見亦不為少方全盛時士大夫家集之藏未必輕出中更黨禁愈益閔匿故一旦紛擾遂不復見而此雖殘缺不全未易得也

蜀中廣記卷一百